

(239)

**1388-IV-13.— Albalá de Juan I relativo al cobro del servicio. (A.M.M., C.r. 1384-91, Fol. 155, v.)**

Nos, el rey de Castiella, de Leon, de Portugal, mandamos a vos, Johan Moraton, nuestro escrivano, e escrivano otrosi, del conçeio de la çibdat de Murçia, que los mill e quinientos florines e quarenta e dos marcos e medio de plata quel conçeio de la dicha çibdat conbusco nos enbio por fazer serviçio en cuenta del pecho que a la dicha çibdat cabe a pagar en el serviçio de las doblas que por los de los nuestros regnos nos fue otorgado en las cortes que fiziemos en Briviesca el año pasado, que los dedes e entreguedes a Johan Sanchez, de Vergara, vezino de Burgos, que los ha de resçibir por nos. E Tomad su carta de pago en commo los ha resçebido de vos, e con ella e con este nuestro alvala, mandamos que sean resçebidos en cuenta al dicho conçeio de los que montare en las doblas e maravedis que la dicha çibdat nos ha de dar del dicho serviçio, commo dicho es.

Fecha treze dias de abril, año del naçimiento del nuestro salvador Jhesuchristo de mill e trezientos e ochenta e ocho años. Yo, Alfonso Royz la fiz escrivir por mandado de nuestro señor el rey. Nos, el rey.

(240)

**1388-IV-20. Quintana Dueñas.— Carta de Juan I relativa a la recaudación de doblas. (A.M.M., C.R. 1384-91, Fol. 155, r.)**

Don Johan, por la graçia de Dios, rey de Castiella, de Leon, de Portugal, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Lara e de Vizcaya e de Molina, a vos, Sancho Rodriguez de Pagana e Bartolome Tallante, nuestros recabdadores del serviçio de las doblas del obispado de Cartajena con el regno de Murçia, que nos fueron otorgadas en las cortes que fiziemos en Briviesca en el año pasado, e a qualquier o qualesquier de vos e a otro qualesquier que por nos o por vos o por qualquier de vos oviere de recabdar el dicho serviçio en la çibdat de Murçia, salut e graçia. Sepades quel conçeio e omes buenos de la dicha çibdat de Murçia por nos fazer serviçio nos prestaron mill e dozientos e treynta e seys florines e medio de la ley de cuño de Aragon, e noventa e çinco doblas moriscas e çinco escudos viejos de oro e seteçientos e quinze reales de plata de tres maravedis, de moneda

